


**TEZAUUR LITURGIC**

**4 IULIE**

**ACATISTUL  
SF. CUVIOS  
ANDREI RUBLIOV  
DE LA  
MOSCOVA**



**MOSCOVA, 2000**



# **Акафист преподобному и богоносному отцу нашему Андрею иконописцу**

## **Кондак 1**

Истиннаго богословия обречение, преподобне Андрее, познав Всесвятую Троицу во Единице, начертал еси изображения святая, чудесами прославленная, мир просвещающая. Имеяй дерзновение ко Пресвятей Троице, моли просветити и наша души, да зовем ти: Радуйся, преподобне отче Андрее, иконописче предивный.

## **Икос 1**

Ангельскаго жития от юности твоея возжадал еси, преподобне: убо ко святей обители великаго Сергия притекл еси и в послушании авве земли русския, дондеже призва тя Господь в небесную обитель, живописа святии образы еси и ныне благодать даруяй всем припадающим к ним. Темже и мы благодарно вопием ти:  
Радуйся, ангельскую чистоту возлюбивый;  
Радуйся, во ангельстем образе послуживый;

Радуйся, в одежду послушания облаченный;  
Радуйся, тезоименный храбрости, во  
иночестве Андреем нареченный.  
Радуйся, смирения ради мирское имя  
сокрывый;  
Радуйся, смирения образы на иконах  
явивый.  
Радуйся, Безначальныя Троицы во Единце  
воспевателю;  
Радуйся, Трисветлаго Бога служителю.  
Радуйся, преподобне отче Андрее,  
иконописче предивный.

### **Кондак 2**

Видя скорбь и разорение земли русския от  
нечестивых, Андрее славне, оставил еси  
надежду на князей и возложив ея на  
Единаго Человеколюбца, научаеши и нас с  
верою взывати Богу: Аллилуиа.

### **Икос 2**

Разум богоозаренный, Андрее всехвальне,  
стяжав, в истощенней нашествии  
иноплеменными земли возскорбел еси  
оскудевшего верою Отечества ради и  
служителем Спасителя стал еси. Сего ради  
мы с любовью восклицаем ти:  
Радуйся, скорби земли русския в свое сердце

сложивый;

Радуйся, сосудом Божиим послуживый.

Радуйся, полон иноплеменного избежал еси;

Радуйся, от плена страстей сердце удержал еси.

Радуйся, в обители Святыя Троицы духом возраставый;

Радуйся, Триипостасное Божество воспевавый.

Радуйся, в любви Христове ныне пребываеши;

Радуйся, нас в вере, надежде и любви укрепляеши.

Радуйся, преподобне отче Андрее, иконописче предивный.

### **Кондак 3**

Силою Всевышняго притекла благодать к воздвижению монастыря Нерукотвореннаго образа Спасова, волею Господа направился ты, преподобне, к сему месту святому и пел еси Богу песнь ангельскую: Аллилуиа.

### **Икос 3**

Имея сердце, послушное Богу и авве Сергию, в обитель на Яузе реце ко святому Андронику направился еси, Андрее богомудре, ведал бо преподобный Сергей грядущее прославление

тобою имени Божия во граде Москве. Мы же, дивяся Божию промышленности, воспеваем ти таковая:

Радуйся, благодатию Божиею в град Москву приведенный;

Радуйся, ко святому иконописательству определенный.

Радуйся, искуснаго живописца Даниила спостника обрел еси;

Радуйся, дар образописания растил еси.

Радуйся, Евангелия в красках воплотителю;

Радуйся, Нерукотвореннаго Спаса изобразителю.

Радуйся, яко иконы твоя свидетельство православныя веры явили;

Радуйся, яко чрез тебе явленныя образы вселенную просветили.

Радуйся, преподобне отче Андрее, иконописче предивный.

#### **Кондак 4**

Бурею житейскаго моря сокрушаемы есмы, созерцанием мира горняго на иконах твоих, Андрее пречудне, тихое пристанище обретаем. И светом дивным озарены есмы, поем Богу: Аллилуиа.

## **Икос 4**

Слышав, создателю икон дивных,  
посвящение времени праздников Богу  
Единому, сии дни не писал еси образов, но  
святыя иконы созерцал еси. Темже ти рцем  
таковая:

Радуйся, во дни Господския и Богородичныя  
созерцанием икон к первообразам  
восходивый;

Радуйся, слезными мольбами у Господа  
подвига иконописательства испросивый.

Радуйся, яко Первому Творцу икон,  
создавшему ветхаго Адама уподоблен еси;

Радуйся, яко Искупителя Адамова падения в  
ликах воплотил еси.

Радуйся, иконотворчеством окна в Царство  
Божие открывый;

Радуйся, себе в икону Божию претворивый.

Радуйся, яко к невидиму свету ум  
возносиши;

Радуйся, от мира дольняго к миру горнему  
нас возводиши.

Радуйся, преподобне отче Андрее,  
иконописче предивный.

## **Кондак 5**

Богородицу и Матерь Света достойнословля  
[1], со тщанием писал еси образы Ея,

воздавая хвалу Единого от Троицы Бога Слова Рождшей, и воспевая: Аллилуиа.

### **Икос 5**

Видев нашествие грозного врага, Андрее святой, молил еси со Церковию и всем народом о даровании избавы от полчищ вражиих. Радость же спасения Державною Помощницею града от супостата запечатлел еси в иконе Всемиловитвыя Заступницы. Мы же, видя любовь твою ко Пречистой, умиленно поем:

Радуйся, любовь велию ко Всепетой Мати имей;

Радуйся, в печали и скорби Ей молитвенно предстояй.

Радуйся, защиты Отечества ради ко Пресвятей Заступнице взывавый;

Радуйся, по изгнании сопостатных поган Приснодеву величавый.

Радуйся, на руку Своею Царя Славы несшую перевозносиши;

Радуйся, рукама своима образ Присноцарствующей запечатлеваеши.

Радуйся, сретение с Богом в сердце хранивый;

Радуйся, Сретенскому монастырю образ Богоматери подаривый.

Радуйся, преподобне отче Андрее,  
иконописче предивный.

### **Кондак 6**

Проповедник живописательный Царствия  
обетованнаго верным был еси, и благим  
своим житием и милостию Божию обрел еси  
его. Помози, отче, достигнути райских  
блаженств и нам, дерзающим взывати Богу:  
Аллилуиа.

### **Икос 6**

Возсиял дар богодухновенный в соборней  
Церкви Благовещения Пресвятыя  
Богородицы, егда пророчески созидал еси,  
Андрее богоизбранне, со Феофаном Гречином  
и старцем Прохором с Городка. Дивляся  
видению твоему, поем:  
Радуйся, изрядный молитвенниче и  
постниче;  
Радуйся, Андрее светлоподобниче [2].  
Радуйся, подобно учеником Христовым  
Фаворским светом освященный;  
Радуйся, Небеснаго Владыки служителю  
верный.  
Радуйся, ангелов собеседниче;  
Радуйся, равноангельнаго жития  
проповедниче.

Радуйся, со Феофаном и Прохором зеркало  
райскаго блажества нам даруеши;  
Радуйся, к Царствию Небесному путь  
показуеши.

Радуйся, преподобне отче Андрее,  
иконописче предивный.

### **Кондак 7**

Хотя обновити Успенский собор во граде  
Владимире, великий князь призва ты со  
спостником Даниилом. Вы же двоица  
блаженная, возводяще ум к  
Невещественному и Божественному Свету,  
вознесеста молитву: Аллилуиа.

### **Икос 7**

Новыя и чудныя образы написали еста,  
Данииле и Андрее, во утихновение  
страждущим. Украсили еста Владимирский  
собор Успения Пресвятыя Богородицы  
шествием в рай праведных со святыми  
апостолы Петром и Павлом во главе и Второе  
пришествие Господа Иисуса Христа  
начертали еста. Мы же, дивляся  
провозвещению твоему, отче Андрее,  
глаголем:

Радуйся, собора Успения Пресвятыя  
Богородицы обновителю;

Радуйся, Не Оставляющая нас во Успении  
Своем дивный похвалителю.

Радуйся, скорбное и светлое шествие  
праведников в рай начертал еси;

Радуйся, ангелов огонь испускающих  
расписал еси.

Радуйся, Второго пришествия Господа  
Всевышняго прославителю;

Радуйся, пространств и времен  
просветителю.

Радуйся, велию радость граду Владимиру  
доставляяй;

Радуйся, по окончании трудов в Москве  
пребываяй.

Радуйся, преподобне отче Андрее,  
иконописче предивный.

### **Кондак 8**

Странником на земли бе еси Андрее  
светонаставниче [3], дара образописания  
ради в веси многажды призываемь. Но и  
пешешествуя, ум и сердце в стоянии пред  
Богом держал еси, непрестанно воспевая  
Ему: Аллилуиа.

### **Икос 8**

Веси инья преукрасив, старче Андрее,  
направил еси стопы твоя во Звениград,

идеже во соборе Успения по благословению  
святаго Саввы игумена создал еси Деисус  
чудно велми. Сего ради тебе зовем:  
Радуйся, по зову Божию стопы своя в путь  
направляеши;  
Радуйся, ум и сердце к стоянию пред Богом  
принуждаеши.  
Радуйся, собора Успенскаго дивный  
украстителю;  
Радуйся, красоты совершенныя в образе  
Спасове явителю.  
Радуйся, Священнаго Писания ревнителю  
усердный;  
Радуйся, Учения Христова живописателю  
верный.  
Радуйся, Святыя Руси прозябение;  
Радуйся, града нашего заступление.  
Радуйся, преподобне отче Андрее,  
иконописче предивный.

### **Кондак 9**

Весь монастырь разорение от нечестиваго  
князя понесл есть, ты же, Андрее святе,  
ведая о упреждении братии обители  
Пресвятыя Троицы аввою Сергием в тонцем  
сне, возгласил еси: Аллилуиа.

## Икос 9

Ветии многовещаннии како могут поведати скорбь и тесноту земли русския от нашествия князя татарскаго, грады жегущаго и грабящаго. Ты же, Андрее преподобне, призван был образописати в каменнем храме во имя Пресвятыя Троицы, воздвигнутем вместо сожженныя деревяныя церкви. Молим тебе: укрепи верою сердца наша, страстьми пожженная, и запечатлей в них образ Пресвятыя Троицы. Милостив буди нам, поющим:

Радуйся, свидетелем спасения братии аввою Сергием ставый;

Радуйся, икону Господа Иисуса Христа-Спасителя написавый.

Радуйся, учиши бо и по разорении церкви не унывати;

Радуйся, помогаеши бо крепчайший храм воздвизати.

Радуйся, образы в обители обновляеши;

Радуйся, образ Божий в сердцах возставляти научаеши.

Радуйся, храма во имя Пресвятыя Троицы украсителю;

Радуйся, себе в храм Трисияннаго Божества претворителю.

Радуйся, преподобне отче Андрее,  
иконописче предивный.

### **Кондак 10**

Спасти хотя землю русскую от розни мира  
сего и памятуя о ревнители Святыя и  
Живоначальныя Троицы преподобном отце  
нашем Сергии, уподобился отче Андрее  
Аврааму гостеприимцу, в образе триех  
странник у дуба Мамврийскаго Единого  
Господа воспринимая, и написал еси икону  
Пресвятыя Троицы, непрестанно моляся:  
Аллилуиа.

### **Икос 10**

Стеною неодолимою буди всем  
православным христианом, Андрее  
славословимый, дерзновенно моля  
Пресвятую Троицу о нас, поющих тебе сие:  
Радуйся, сподобился еси явление  
Триипостаснаго Бога у дуба Мамврийскаго  
написать;  
Радуйся, помогаеши бо душам в Царство  
Небесное прорасти.  
Радуйся, Церкви Российския чудный плоде;  
Радуйся, иконописателю таинственного  
догмата Троицы.  
Радуйся, преподобнаго Никона прилежный

послушниче;

Радуйся, святого Сергия Радонежскаго чудотворца достойная похвало.

Радуйся, тобою бо Единство в Троице Отца и Сына и Святого Духа прославляется;

Радуйся, воззрением на чудотворныя иконы твоя рознь мира побеждается.

Радуйся, преподобне отче Андрее, иконописче предивный.

### **Кондак 11**

Пение ангельское ублажа тебе, егда возвратився в Андроникову обитель, в небесныя обители преселитися готовился еси, вопия Богу: Аллилуиа.

### **Икос 11**

Светоявлением во славе Даниилу спостнику, на одре смертнем лежащу призвал еси последовати себе, и сретил еси с любовию от мира сего отшедшаго. Чесо ради водворение тебе, преподобне Андрее, во Царствие Пресвятыя Троицы воспеваем:

Радуйся, земная странства завершивый;

Радуйся, друга из мира дольняго и в мире горнем любивый.

Радуйся, свидетельство истины Православия всему миру являеши;

Радуйся, и ныне истинно Бога в Троице прославляеши.

Радуйся, талант вверенных умножение;  
Радуйся, Царствия Святыя Троицы достижение.

Радуйся, и по преставлении нас не оставляеши;

Радуйся, радость православным христианом доставляеши.

Радуйся, преподобне отче Андрее,  
иконописче предивный.

### **Кондак 12**

Благодать храма во имя твое, иконописче Андрее, изливается окрест и зовет всех отвратився от тленного, обратити ум, сердце и дела к Богу, прославляя Его: Аллилуиа.

### **Икос 12**

Поюще созидание храма твоего в Раменках, ублажаем тя, отче наш Андрее, яко молитвенного предстателя за ны Пресвятей Троице и возглашаем ти таковая:

Радуйся, нас яко овчу заблудшую на рамена взявый;

Радуйся, по прославлении местом храма своего Раменки избравый.

Радуйся, общину верных Пресвятей Троице

созидаю;  
Радуйся, святым житием твоим к святости  
призывая.  
Радуйся, дерзновением к познанию истины  
поучаешь;  
Радуйся, Отца и Сына и Святаго Духа  
прославляешь.  
Радуйся, един из воинства Христова;  
Радуйся, пастырю наш предобрый.  
Радуйся, преподобне отче Андрее,  
иконописче предивный.

### **Кондак 13**

О дивный иконописче, преподобне и  
богоносне отче Андрее! Приими с любовью  
тебе приносимое малое сие хваление и моли  
Пресвятую Троицу: да укрепит веру  
православную, да избавит нас от розни и  
сподобит со избранными своими воспевати  
славимаго в Троице Бога: Аллилуиа.

[Этот кондак читается трижды, затем 1-й  
икос: Ангельскаго жития: и 1-й кондак:  
Истиннаго богословия обретение:]



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**